

HÆC Tabula reliquas Angliæ partes habet, *Warwicum, Northamptoniam, Huntingtoniam, Cantabrigiam, Suffolciam, Oxonium, Buckinghamiam, Bedfordiã, Hertfordiam, Essexiã, Bercceriam, Middelsexiam, Southamptoniam, Surriam, Cantium, & Southsexiam*, serie ea quam ex Ptolemæo seruandam esse alibi ostendimus. Regiones istas singulas accuratè describere, longi esset operis, quum singulæ librum mereantur, sunt enim foelicissimæ & prouentu rerum quas natura possit expetere non ad vsum tantum sed etiam ad delitias, opulentæ. **MIDDLESEXIA** ex eo nomē habet, quod hic Saxones medio loco inter Orientales, Occidentales, & Australes, qui vulgo *Essex, Wessex & Southsex* vocantur, sedem suā posuerunt, in agro Trinobantum, ad flumen *Tamisin*, qui vt in Iudæa Iordanes ex duorū fluuiorum *Sac & Dan* concursu nomen habet compositū: ita ab *Iside & Tamā* iunctis *Tamisis* vna voce appellatur. Ad eam sexaginta ab Oceano millibus passuum sitū est nobile *Londiniū*, totius Angliæ epitome, Tacito, Ptolemæo & Antonino *Londiniū & Longidiniū* dicitur, sub Valentiniano etiam *Augusta*: itaque in notitia Imperij legas, *Præpositus Thesaurorum Augustensium in Britannia*. Est autem verè *Urbs animis numeroq; potens, & robore gentis*. Episcopum habuit iam sub Costantino Restitutum, cuius in Concilio Arelatensi mentio est. Templum hic nobile B. Pauli. Arx præterea munitissima Angliæ totius armamētariū, in qua officina monetaria. Pons quoque e viuo saxo nouendecim fornicibus distinctus, stupendum opus, quum vtriusque splēdidis ædificijs, & via inter ea discurrente sit exornatus. Est & Bursa siue peri styliū ad vsum mercatorū qui ex omnibus orbis partibus eo concurrunt. Infra urbem est domus regia *Grimwicia*, supra, prætorium *Richemundum*: Est & *Vestmonasterium* foro iudiciario, & regiā longè celeberrimū; templo etiā B. Petri, in quo reges inaugurari ac defunctos sepeliri mos est. In **CANTIO** sunt *Douera* quæ *Dubris*, & *Sandwikum*.